



TIERCE EDIZION PAR SUNS EUROPE: IL BIEL DE DIVERSITÂT IN SENE A UDIN

*L'event culminant al sarà ai 2 di Dicembar tal
 Teatri Gnûf Giovanni da Udine*

Chest an **Suns Europe**, il Festival european des arts performativis in lenghe minoritarie, al sarà eletropop e rock&roll, ma ancje rap, indie rock, percussions eletronicis e cetant ancjemò, parcè che *Suns* nol è dome musiche. Il cuadri dai ospits des trê zornadis - **dai 30 di Novembar ai 2 di Dicembar** - al è aromai definit e, dongje dai 'parons di cjase' dal Friûl, si varan grups, regjiscj, scritôrs e atôrs che a rivin di País Basc, Gales, Cjanton dai Grisons, Bretagne, Galizie, Ocitanie, Basse Sassonie, ma ancje de tiere dai Sami, de Irlanda, de Sardegne e de Buriazie (logade dongje de Mongolie).

Cemût che al sucêt di trê agns incà, *Suns Europe* al sarà un **confront tra lenghis cuntune storie antiche e formis di comunicazion contemporanie**. Un Festival fat di **art, miscliçaments, snait, pluralisim linguistic, creativitat**. L'apontament al è simpri al dal **Teatri Gnûf "Giovanni da Udine"** (ma no dome) dulà che a saran protagoniscj **musiche, cine e letature intes lenghis minoritariis de Europe**.

Ancje tal 2017, *Suns Europe* si conferme tant che il principâl Festival european che al conte e al fâs cognossi a duç lis lenghis minorizadis e par chest al gjolt, pe tierce edizion, dal patrocini dal Consei de Europe. L'intindiment al è chel di promovì produzionis artisticis originâls di cualità e di mostrâ cemût che la diversità linguistiche de Europe, in plui di jessi une ricjece culturâl e un dirit di fonde, e je une risorse creative impuartantone. Un **centenâr di artiscj** a rivaran cussì a Udin par dâ vite a di une vere Babel di lenghis, di *suns* e di miscliçaments di no pierdi, e par cjapâ dentri i furlans intai tancj apontaments dal program. **La manifestazion si sierarà cu la serade event che si tignarà tal Teatron di Udin, sabide ai 2 di Dicembar, a partì des 9 di sere.**

Suns Europe al è un progjet inmaneât des cooperativis Informazione Friulana (editore di Radio Onde Furlane) e Puntozero cu la poie de ARLeF (Agenzie Regjonâl pe Lenghe Furlane), de Regjon Friûl - Vignesie Julie e de Fondazion Friuli, cu la colaborazion dal Comun di Udin, de Fondazion Teatro Nuovo Giovanni da Udine, dal Babel Film Festival e cul patrocini dal Consei de Europe.

La jentrade a duç i events di *Suns Europe* e je gratuite. Dut il program dal Festival, lis informazions e lis modalitâts par ritirà i biliets pe serade finâl dai 2 di Dicembar si puedin cjatà su www.sunseurope.com e su la pagjine Facebook 'SUNS Europe'.

